

太宗皇帝實錄

太宗皇帝實錄卷三十六

起太平興國八年六月盡十月

六月乙酉朔以給事中直學士院徐鉉為右散騎常侍以職方員外郎高繼申為兩浙諸州轉運使丙戌河南府言洛水漲五丈餘壞鞏縣官寺軍壘民廬舍殆盡左諫議大夫知開封府邊珣卒珣字待價華州下邳人父蔚仕至太常卿珣天福六年舉進士登第解褐授秘書省秘書郎直昭文館遷右補闕起居舍人改庫部職方員外郎受詔知通州以牢盆賦於民大煮鹽於卽山歲得萬餘石國初出為洛陽令銜為

倉部郎中龍蜀平命珣知三泉縣入為職方郎中揚
州言民盜殺廣陵縣尉謝國父捕繫民凡三百日獄
未具州以聞命珣按之盡得其實民抵罪開寶中知
揚州會征江表兼領淮南轉運使上即位遷吏部
郎中嶺南轉運使銜為右諫議大夫領吏部選事移
知開封府至是卒年六十三珣強力有吏材上方
欲倚用及聞其死嗟嘆者數日賜其家絹百匹錢二
十萬以營葬事丁亥以翰林學士中書舍人李穆知
開封府膳部郎中知雜膳中正為右諫議大夫權御

史中丞吏部郎中許仲宣為左諫議大夫依前嶺南
轉運使兵部郎中劉保勲為右諫議大夫刑部郎中
辛仲甫為右諫議大夫依舊知益州以庫部員外郎
楊徽之為刑部郎中大理正孔承恭為庫部員外郎
同考校京朝官殿最甲午河南府言穀水伊水洛水
湓水暴漲溢出岸壞官寺軍壘寺觀祠廟民廬舍萬
餘區溺死者以萬計丁酉詔曰自今京朝官知錄事
參軍及知縣事者見本郡長吏用賓主之禮宴集班
位其常參官在判官之上未常參官在推官之上所

乘馬並不得用繁纓連者所在以聞當行責罰已亥
制曰漢以尚書平處奏議魏以中書參掌機密邦國
之務率繫於樞衡軍旅之謀多出於帷幄授受之際
厥惟難哉宣徽南院使兼樞密副使金紫光祿大夫
檢校司徒上柱國瑯琊縣開國男王顯器量恢宏襟
靈秀拔常事藩邸備極公忠累踐榮班遂膺顯用風
雨如晦益勵匪躬之誠夙夜惟寅愈挺致君之志樞
機之任獻替尤資宜正名稱用伸毗倚勉堅許國之
節式副知臣之明可檢校太保充樞密使進封本郡

侯上召謂顯曰卿代非儒門少罹兵亂必寡學問
今在朕左右典掌萬機固無暇博覽羣書命左右取
軍戒三篇賜顯曰讀此亦可免於面牆矣又以宣徽
北院使柴禹錫為宣徽南院使依前樞密副使右諫
議大夫王明為給事中依前充鹽鐵使左衛將軍陳
從信為本衛大將軍依前度支使潭州言長沙縣民
翟景鴻五世同居內無異爨詔旌表門閭常稅外免
其他役陝州言永定澗水漲溢出岸壞民廬舍軍壘
千餘區丙午乾寧軍言御河水漲七尺五寸戊申新

及第進士王世則以下十八人送中書門下處分餘
並送流內銓命文明殿學士李昉樞密直學士張齊
賢王沔中書舍人王祐同於吏部注擬 上謂李昉
等曰天下州縣闕官朕親選多士忘其飢渴召見臨
問以觀其才豈望拔十得五但十得三四亦巖穴無
遺逸朝廷多君子矣朕每見布衣搢紳間有端雅為
衆所推舉者朕代其父母喜或召拜近臣必擇良日
欲其保終吉也朕於士大夫無所負矣昉等拜謝已
而兗州言泰山父老并瑕丘等七縣民陳延福等千

四百九十三人自言詣闕請封禪遣觀察判官廖文
鐸護送之辛亥賜樞密使王顯開封府道德坊宅一
區賜宰相文明翰林樞密直學士中書舍人節度觀
察使建州所貢新茶

秋七月甲寅朔工部侍郎致仕劉載卒載字德興范
陽人唐節度使總之五代孫也父昭任潁州下蔡令
載後唐清泰中舉進士及第解褐授祕書省校書郎
累遷左拾遺集賢殿學士改殿中侍御史周顯德中
歷倉部員外郎知制誥擢拜右諫議大夫給事中

初出知貝州代還奉使江表復命知鎮州坐與兵馬
部署何繼筠不協為所構太祖惡之出為山南東
道節度行軍司馬僅十年上即位銜赴闕復為給
事中以老病乞骸改工部侍郎致仕仍賜一子出身
至是卒年七十六載頗刻勵為學博通史傳著乎戰
國賦萬餘言行於世雅好釋氏佞佛甚謹晚年專以
蔬食誦經為事雅尚名節頗為流輩所稱戊午泰山
父老辭歸故郡各賜束帛以遺之以新及第進士王
世則等一十八人並為大理評事知縣錄事參軍又

以第二等進士吳鉉為大理評事史館勘書鉉餘抗
人舉進士嘗重定切韻及上親試因捧以獻既中
第因令隸史館校定字書故有是命鉉所定切韻多
以吳音作俗字數千增之鄙陋尤甚尋禮部試貢士
為鉉韻所悞有司以聞詔盡索而毀之永不得行用
丁卯制曰計功稱代則銘於旂常尚齒優賢則賜以
几杖我有舊老時惟宗臣願追赤松之遊盡納水衡
之俸不舉殊典何答元勳開府儀同三司檢校太師
行右金吾衛上將軍判街仗司事上柱國邠國公王

彥超早擁節旄更藩閭許國之誠風厲臨戎之績
素高為列辟之楷模實累朝之勞舊緩騎二百寵以
執金之權宸居九重幸成高枕之適遽形表疏願避
官榮爰推進秩之恩以遂懸車之請優以康給表予
春懷可太子太師致仕仍依舊給右金吾衛上將軍
俸料已已安化軍節度使沈承禮卒承禮字正臣吳
興人錢鏐辟置幕下攝處州刺史鏐卒子元瓘以其
女妻之署以牙校及錢俶襲位加承禮知威武軍節
度使王師征江南俶命承禮率所部助攻毗陵平之

又攻潤州吳人夜竊出焚外柵將帥皆欲馳救承
禮曰古人有言擊東南而備西北者此之謂也命士
皆擐甲蓐食堅壁不動他壘不設備者悉驚擾獨承
禮所部整肅吳人不敢窺既平丹陽遂率兵抵建業
江南平 太祖錄其功特授威武軍節度福州管内
觀察處置等使 上即位錢俶盡獻浙右之地以承
禮為密州刺史安化軍節度使至是卒年六十七詔
輟視朝兩日贈太子太保葬事官給辛未制曰中書
舍人參知政事郭贄等持橐獲侍於初潛曳組鳴

珂久塵於清切頃參台席實代天工而啓沃蔑聞尸
素斯極飲酒過量自貽沉湎之譏發言無稽益彰容
易之態所宜左降尚屈典刑可責授祕書少監壬申
以左衛上將軍向拱領左金吾衛仗事宥州刺史李
繼瑋為右清道率府副率庚辰以左諫議大夫宋琪
為刑部尚書依前參知政事文明殿學士工部尚書
李昉守本官參知政事辛巳詔開封府管內酸棗陽
武封丘長垣等四縣民田為黃河水所害及開封浚
儀中牟尉氏襄邑雍丘等六縣民田為蔡河廣濟白

溝河溢及水滂所損者並蠲其租鄆州言河水漲溢
入城壞官寺民廬舍四百餘區河南府言黃河水漲
五丈七尺壞河清縣皇饒務倉庫軍壘民廬舍千餘
區荊門軍言長林縣山水暴漲壞民廬舍五十一區
凡五十六人溺死陝州言河水漲斷浮梁壬午免監
察御史張翼仍劄四任坐通判鹽州日縱部下館驛
吏擅費用官物而不舉也夔州言江水漲七尺乾寧
軍言御河水漲六尺襄州言漢水漲三丈二尺破虜
軍言潯池河水漲一丈四尺祁州言資河水漲溢入

城壞軍壘民廬舍百餘區滄州言葫蘆河漲水八尺
雄州言易水漲一丈三尺壞民廬舍癸未 駕幸舍
芳園習射張樂賜從官飲

八月戊子朔以祠部郎中羅延吉兼侍御史知雜事
辛卯司天言壽星見丙地海門珠珠場貢真珠二百
二十八斤壬辰制曰古先哲王恭默思道一物失所
在予之罪實深四時不和責躬之言尤切今歲天降
霖雨自春徂秋水出平原河決近郡下民離於昏墊
大田變於污萊蓋念堯舜之功格天不能逃陰陽之

數禹湯之言罪已所以致邦國之興朕端居九重夕
惕若厲潔粢豐盛以懇禱卑宮菲食以隱憂至誠上
通和氣來應氛靈清霽穰穰豐穰取萬箱而可期食
四輔而何遠宜伸肆菁之澤以答乃春之仁應西京
諸道州府軍監縣鎮繫囚限德音到日除十惡官吏
犯正枉法贓及謀殺故殺劫殺人外其餘罪無輕重
特與除放諸處亡命軍人及聚山林為羣盜者限詔
到一月並許於所在陳首限滿不首復罪如初配流
徒役人等並具元罪犯以聞別聽進止癸巳詔曰桂

州管内先配民歲市沙糖及茶園久荒吏歲徭其課
先以官牛給與民歲取租牛死而吏猶督其直關市
征常額外增錢百八十貫文並除之官牛二百三十
頭賦與貧民丁酉山後兩林蠻王子牟昂等二百三
十九人以名馬來貢以右補闕直史館徐休復為職
方貢外郎右贊善大夫孫易簡為右拾遺並加知制
誥詔曰朕選用羣材分領庶職雖九品之賤一命之
微未嘗專委於有司必須召對於便殿親與之語以
觀其能僥敷納之可觀必越次而命賞恩或由於僥

律理未至於澄清自今應親臨選擢官吏並送中書
更審勘履歷別聽進止辰州言溪錦叙富等四州蠻
求內附輸租稅詔令州長吏察其徭俗情偽并按視
山川地形具圖來上戊戌以故永興軍節度使吳廷
祚次子元表為右衛將軍駙馬都尉徐州言清河張
一丈七尺溢出境塞城三門以禦之庚戌制曰宥密
之務蓋總於萬機師長之任實參乎百揆職事斯設
在勞逸而則殊名器所先固授受而惟允樞密使金
紫光祿大夫戶部尚書上柱國樂陵郡侯石熙載達

議兼濟偉量旁通早在初潛賓預賓佐韋弦之誠動
靜有常金石之誠夷險如一自總鈞軸屢進謹言方
參帷幄之謀速嬰寒暑之疾抗章引退瀝懇彌堅宜
推加等之恩即俟有瘳之喜勉思順養式副倚毗可
尚書右僕射先是熙載以足疾假滿抗表解職故有
是命辛亥詔增周公謚法五十五字美謚七十一字
為一百字平謚七字為二十字惡謚十七字為三十
字仍令翰林學士承旨崔蒙中書舍人王祐同詳定
蒙等奏議曰上所增五十五字皆可用其沈約宋琛

續廣謚請停廢詔從之詔曰史氏之職歷代所先政
令之大小必書人君之言動皆錄累朝多故舊典闕
如策書所記言殊為漏落自今軍國謀議宰相與聞
者宜令工部尚書參知政事李昉撰錄每季終送史
館樞密院公事亦令副使一人專知纂錄送付史氏
昉上言所修時政記每月先以奏御後付所司從之
壬子詔曰先是祠部給僧尼牒並傳送諸處州長吏
親給如聞吏為姦募人以緡錢市取齋以至外郡賣
焉得善價即付與之自今所在宜奉行前詔違者重

致其罪

九月癸丑朔以洛苑使王賓領潭州刺史與儒州刺史許昌裔同知水路發運軍器庫使順州刺史王繼昇駕部員外郎劉燾同知陸路發運先是每歲運江淮米四五百萬斛以給京師率用官錢僦牽船役夫頗為勞擾至是每艘計其直給與舟人俾其自募甚以為便而舟數百艘留河津月餘不得去上遣期門卒備之計吏自言有司除常載外別科買羊皮赤堊鉛錫藥木等物守藏者不即受故也上怒奪

三司使一月俸分命王賓等領水陸發運自是貢輸
無滯矣以國子監主簿楊文舉為國子監丞史館編
修宿州言濰河水漲溢寢民田六十里祕書監錢昱
獻太平興國錄一卷戊午詔曰近年已來河堤頻決
壞廬舍害田畝數郡被其害先是築遙堤以遏水勢
民利其膏沃多種藝居處於其中河漲即罹其患宜
令殿中侍御史柴成務國子監丞趙孚供奉官萬彥
恭殿直郭載分往河南北岸按行遙堤有不牢處發
丁男治之民先占堤內種植者免其稅遷於善地焉

御製晚秋五七言詩二首賜近臣甲子詔曰臨淮壽
春浮梁先禁馬高五尺已上不得渡准令江浙已平
吏猶守舊法宜除之乙丑詔曰國家新本厚生取什一
之稅豐財足用聚九年之儲兵食所資蓋不得已尚
念力耕數耘之苦祁寒暑雨之勞供王租而既勤獲
地利而甚薄先是兩稅起衡特設三限，外又加一
月州縣吏苟務苛虐固守章程施鞭朴以立威用陪
克而為政不體勤恤之意自求課最之名昔之良吏
善治民者有增租從調減年就役之事豈若是乎自

今宜令諸州長吏本判官錄事參軍專察所屬縣令
主簿政治善惡書於吏部南曹曆子外以其狀聞當
申黜陟用彰朕愛民之旨焉先是上謂宰相曰朕
視萬民如赤子念其耕稼之勤春秋賦租軍國用度
所出恨未能去之此令三限外特加一月而官吏不
體朝旨自求課最恣行箠楚以求辦事此一事尤傷
和氣宜下令申儆之故有是命丙寅詔曰荆湖江浙
淮南諸州每歲上供錢帛遺部民之高資者護送至
關下非便自今直遣牙校勿復擾民先是上謂宰

相曰諸州於部內擇高資戶部送官物民家人質魯
無御下之術高工攝師皆頑猾不逞輩侵盜官物恣
為不法民家多破產償之甚無謂也故有是詔授山
後兩林蠻王弟牟昂懷化大將軍首領王子牟蓋磨
忙畢塊並授歸德即將副使牟計等一百二十人並
授懷化司戈丁卯海州言州城內東山坡先廢佛牙
寺真身塔相傳言隋末土人於巖崖間聞誦經聲一
日天大雨崖崩土人共見桑門坐於崖下逼而視之
膚皁如生人但氣息已絕因立塔廟祠之顯德中詔

毀廢佛寺而桑門真身獨存開寶初節度使張鐸親
禱之有神光之異鐸欲建於城東天大雨雹不果遷
而止州民列狀願復築宮祠之詔從其請仍賜號聖
因院交州黎桓遣使貢方物已已以軍器庫使王繼
昇為左神武將軍依前領順州刺史洛苑使王賓為
右神武將軍依前領濱州刺史庚午吐蕃戎人以名
馬來貢召見其酋長於崇政殿因謂宰相曰蕃戎言
語不通衣服異制朕常以禽獸畜之自唐已來頗為
遺惠以國家兵力聊舉偏師即可驅於數千里外但

念其種族蕃熾各安其土僮盡驅之必恣殺戮所以
置於度外存而勿論也各賜酋長束帛以慰撫之癸
酉詔曰廣州歲貢藤每斤去鐵籠外中用者才三兩
大通治歲輸鐵尚方鑄兵器鍛鍊外十纔得其四五
自今嶺南貢藤取其堪用者大通治輸鐵先鑄成器
俾官工淬治之無使負重致遠困民力焉丙子占城
獻馴象能拜伏詔養於寧陵縣丁丑以河決未塞命
樞密直學士張齊賢兼傳詣白馬津以太牢沉祠加
以壁太平軍言颶風拔木壞官寺民舍一千八百十

七區海門採珠場貢真珠一百二十斤

冬十月甲申詔衛侍衛馬軍都指揮使定州兵馬部
署朱信赴闕以新譯經五卷示宰相因謂之曰浮屠
氏之教有裨政治而梁武捨身為寺家奴布髮於地
令桑門踐之此真大惑朕甚不取也先是胡僧自西
域齎貝多葉經至朕因令以華語譯之殆百餘卷雖
小道亦有可觀卿等試之蓋存其教耳非溺於釋氏
者也以西天竺中印土譯經三藏僧法護為明法大
師戊子詔祀土德於黃帝壇珪幣牢具如大祠制禪

和官領之己丑

軋明節羣臣上壽越州以王羲之

畫像并其石硯來獻庚寅詔賜諸軍校百夫長已上
建州茶有差并賜諸營卒翦草茶各一斤丁酉宴中
書門下翰林學士樞密直學士文武常參官節度觀
察防禦團練使刺史諸軍校百夫長已上諸州進奉
使外國蕃客於大明殿戊戌命西八作坊使張瑤知
房州詔皇長子衛王德崇改名元佐第二子廣平郡
王德明改名元佑第三子德昌真宗改名第四子德
嚴改名元萬第五子德和改名元傑皇姪孫文雍改

名惟吉文治改名惟正文起改名惟忠文宸改名惟
貞己酉制曰入總國政實冠三司之崇出分閭寄幸
常二老之任所以推恩禮於輔弼伸倚注於勲賢斯
為大猷豈敢虛授開府儀同三司守司徒兼侍中昭
文館大學士梁國公趙普挺鍾間氣富稟謀明草昧
之初締構之功克著巖廊之上陟沃之效居多朕疇
咨老成參用舊德再授鹽梅之寄用師藥石之言彌
縫之績既彰調燮之勤期著煩我耆艾職茲樞衡授
以蕃宣均其勞逸用加掌武之秩以增衛社之雄大

啓南陽夾輔王室可檢校太尉兼侍中行鄧州刺史
武勝軍節度使是日制以皇長子衛王元佐進封楚
王第二子廣平郡王元佑進封陳王第三子真宗舊名第
四子元雋第五子元傑並授特進檢校太保同中書
門下平章事上柱國真宗舊名封韓王元雋封冀王元傑
封益王以保靜軍節度使劉遇為滑州刺史武成軍
節度使

太宗皇帝實錄卷第二十七

起太平興國八年十一月至十二月

十一月壬子朔制曰平章百姓唐堯所以疇咨總領衆職漢宣由是致治非賢固又得士則昌聿求經濟之才授以弼諧之任枚卜斯允成命以行刑部尚書參知政事宋琪字量冲深規模宏遠工部尚書參知政事李昉爵有公望久服大僚而皆罄竭謨明裨贊樞軸君臣之際人無間言公家之事行有餘力修經術以自輔體方直而靡渝是宜擢正台衡職茲調燮朕所注意不假審象之求汝旣致君更思補衮之效

唯用盡已佇茲沃心欽若訓詞往踐乃位並守本官
同中書門下平章事加金紫光祿大夫琪封廣平侯
郡侯昉封隴西郡侯以皇姪孫惟吉為左監門衛將
軍封平陽郡侯惟正為左千牛衛將軍惟忠惟貞並
為右千牛衛將軍癸丑詔曰先是開寶二年八月丁
亥詔書應廣南東西川峽路諸州民祖父母父母在
子孫別籍異財者棄市自今並除之論如律泗州言
僧伽塔白晝有光民燃頂及焚指斷臂者數千人吏
不能禁甲寅詔曰並建子弟以藩屏王室申命相輔

以羽翼公朝舊邨之任雖崇鈞台之寄尤重幸分內
外頃正等威自今宰相序立宜在親王之上刑部尚
書平章事臣琪工部尚書平章事臣昉等頓首言鈞
衡之任止曰台司盤維之封實承天緒漢法丞相在
諸侯王之下唐制元子非百執事之列典故昭晰載
在策書伏望聖慈俯遵前軌上不允琪等又叩頭
固讓久之上曰宰相之任實總百揆與羣官禮絕
藩邸之設止奉朝請而已元佐等尚幼欲其知謙損
之道御無至固讓也琪等拜舞稱謝戊午高陽關捕

得契丹生口送至關下召見言契丹種族懾恐王
師討伐於近塞築城為備上謂宰相曰戎虜以剽
掠為事乃修城壘為自全之計蓋天亡之時也往者
劉繼元盜據汾晉周世宗及太祖皆親征不利朕
決取之除心腹之患為世宗太祖刷恥擒劉繼元
致闕下今日視之猶机上肉耳當其保堅城結北虜
為援豈易制乎宋琪對曰臣少陷虜庭備知戎馬之
數自晉末始強盛然種族蕃多其心不一自石嶺關
之敗平劉繼元三交高陽關及沿邊諸郡頻有克捷

以臣度之其部下攜貳必多國家不煩致討可坐待
其滅也已未御製蓮花心輪回文偈頌十部共二百
五十卷回文圖十軸以示宰相近臣城南太一宮成
命樞密直學士張齊賢司天春官正楚芝蘭祠五福
太一齊賢等上言太一五帝之佐天神之至貴者也
請用祀天之禮殺其牛又小損之上令增教坊伶
官百人自昏祠至明如漢祀之制丙寅楚王元佐等
五王同日起中書視事西八作使郝守濬責授慈州
團練副使坐護塞河決懲無狀也丁卯宴近臣於長

春殿餞武勝軍節度使趙普武成軍節度使劉遇赴
鎮也 上賜普詩普捧而泣曰陛下賜臣詩當刻於
石與臣朽骨同葬泉下 上亦為之動容宴罷謂近
臣曰趙普於國家有大力朕布素時與之游從今
齒髮衰矣不欲煩以樞務擇善地俾之卧理因詩什
以導意普感極且泣朕亦為之墮睫君臣之際亦盡
善矣時樞密使王顯等側侍頻視 上褰 上怪而
問之顯等曰陛下所衣袴文縷側側 上笑謂曰朕
未嘗御新衣蓋澣濯頻所致耳 上因言此偏下已

爲冀王府翊善著作佐郎姚坦爲益王府翊善已卯
詔江南兩浙劔南東西川峽路嶺南河東知州通判
知軍知縣及監掌祭務官等自今滿三考並與移替
庚辰詔史館所修太平總類一千卷且今日進三卷
朕當親覽焉自十二月一日爲始宰相宋琪等言曰
天寒景短日閱三卷恐聖躬罷倦上曰朕性喜讀
書頗得其趣開卷有益豈徒然也因知好學者讀萬
卷書非虛語耳以著作佐郎呂文仲爲翰林侍讀賜
緋魚袋辛巳以郴州刺史孫方進爲右領軍衛將軍

十二月壬午朔詔曰綏銀夏等州民多流亡入蕃部
宜令州縣吏設法招誘俾之復業仍給復三年丁亥
詔自京至廣州傳置卒月別給百錢河北河東道沿
邊成卒人賜黃絹襦一絮以綿京城內外諸軍卒人
給米一石 准海國王錢俶上言曰臣以蕞爾之軀
蒙被恩寵賦祿百萬兼職數回元帥之任竇本於兵
柄國王之號蓋屏於王室尚書則總百揆之重中書
則掌八柄之繁維師冠於上台開府率當於極品臣
之眇末固克負荷邦國之制式著典常名器之間固

有涯分徒速罪戾以取顯擗伏望聖恩特從省罷優
詔不允表三上降制曰分茅胙土所以彰世及之榮
大路繁纓所以表器數之重至若褒寵勲舊度越典
常曲阜肇分得用六代之樂平堦光啓許載九旂之
旂咨于舊章爰推異數乃有體好謙之德形固讓之
辭三扣帝閭確乎不拔用屈至公之論式光知止之
風天下兵馬大元帥開府儀同三司守太師尚書令
兼中書令淮海國王食邑八萬戶賜劔履上殿詔書
不名錢俶方猷炳靈風雲玄感奄有句吳之地不忘

象親之心挈族來朝舉宗宿衛盡以版籍入于朝廷
爰分寶玉胙之淮海居天子二老之任啓真王萬室
之封併加寵名用答忠順而乃圓形表疏願避官榮
諭之再三誠不可奪若以重臺偃伯武庫彙兵天下
一家書軌之無外五侯九伯征伐之不行願寢元帥
之名勉徇由衷之請其乃世祚明德存于帶礪之盟
帝養良弼寵以鉤台之任維師之秩馭貴之階非是
懋功適以昭德勉膺渥澤克副乃懷仍加食采之封
載光書社之數可依前守太師尚書令兼中書令准

海國王加食邑三千戶庚子詔曰史館新纂太平總
類一千卷包括羣書指掌千古頗資乙夜之覽何止
名山之藏用錫嘉稱以傳來裔可改名太平御覽癸
卯滑州言河決已塞羣臣稱賀甲辰詔曰朝廷比設
貢舉以待賢材如聞緇褐之流多棄釋老之業反襲
襲博求竊科名自今貢舉人內有曾為僧道者並須
禁斷其進士舉人只務彫刻之工罕有通經素之學
不曉經義何以官人自今宜令禮部貢院特先帖經
只試墨義二十道較其能否以定黜陟其諸科舉人于

本業外別試法書墨義十道著為定制乙巳以著作
郎李沆直史館丙午右補闕直史館胡旦獻河平頌
曰臣 宋受命二十有五載夏五月河決于滑示災
也冬十有二月塞之明功也古之王者必有大惠然
後彰大聖必有大災然後成大成功堯之水湯之旱
太宗之蝗玄宗之蝗皆所以彰災患而成聖功也嘗
堯之時三苗未^殊舉四凶未除天示大水以滌羣兇湯
之時夏政未釐商民未熙天示大旱以燠洗風太宗
之時餘寇未平大政未成天示其蝗以噉萬物之蠶

玄宗之時羣賢未集大禮未立天示其彗以掃萬國
之雄則患息而啓聖災平而著功斯亦我宋之大
道聖績之無窮也太平興國紀號之始在國家經營
克復之際庶戎夷狄固不來格初祠烝嘗固不克備
文教被於內武德煥其外天子凝旒以示化宰相
備位以充職而姦生治平釁發無事賦臣多遜陰泄
大政與孽弟廷美說詛不道哀構大難賴天地
社稷之福聖皇之靈覺而黜之時又彊臣普恃功
貪天違理背正削廢大典構豪傑之罪飾帝王之非

榛賢士之路使恩不大賚澤不廣洽越八年夏河擁
積石潰龍門壘砥柱泊大伾高峯為羈長岸為桔怒
無所作水潦羣凶大決于滑漂漣蕩潢浮曹沈濟灌
于彭門注于淮泗孟諸鉅浸漫漫而海獸無攸虞烏
無攸居况于人民乎况于州邑乎羣臣僉言築防以
為捍 帝曰非是也百姓不親五品不訓司徒之過
也敷奏不以言明試不以功侍中之咎也墮其下而
不聞于上蔽其賢而不進于位宰相之罪也漢家法
制以災異責三公申命有司明舉舊典即譴善于鄧

假節為帥示優恩也乃命內客省使郭守文督內謁
者中常侍暨廷臣受旨者凡數十百人役兵籍民凡
三十萬竹木土石之數不可勝計以某月日經始至
某日畢功自始至畢皆騎置成算以授之莫不鳩大
功集巨力如坻如阜如山如崗衣土以薪實舟以石
沈之築之是壅是塞濤回浪轉川動雷駭截洪流之
迅奔歸故道以長往巨岸山峙巨防截立大災以寧
大功以成是月癸卯使者馳以奏甲辰平章事臣琪
臣昉參知政事臣務臣蒙正臣至與將軍大夫郎中

博士再拜稱賀上言曰玄天降靈大河已平聖功巍
巍子孫相承斯為陛下之德也小臣職在史氏位司
諫列豈不以天祐聖宗方鳩大功大功無所發必
有大災旱不能有蝗不能生彗不能見必有大水與
堯同休是天子前黜多遜後譴臣普防大患而過
大災也塞洪河之決䟽德澤之壅彰大聖而成大功
也功已立而不宣儒臣之罪也且其發頌聲褒形容
以明萬萬之休烈臣且不敏不明謹獻頌曰天祚我
宋以君兆民配天承休惟堯與鄰粵有大水昏墊下

人非曰聖祚執究孰慶蔽賢者退墮澤者罪我防大
患河崑云敗逆遯遠投姦晉屏外聖道如堤崇崇海
內帝曰守文是塞是親調爾衛兵程爾蒸民民以
盡力臣以勤職役云其終何以之塞唐堯懷山實擊
神德漢武宣防實彰令德我塞長河融流惠澤明明
聖功萬代成則上覽之震怒召宰相謂曰胡旦所
獻頌詞意悖戾朕自擢于甲科歷試外任所至無善
狀知海州日為部下所訟獄已具遣會大赦朕錄其
材而捨其罪尚今在近列又領史職乃敢自恣兇臆

狂躁如此今朝多君子如此人豈宜尚列於侍從耶
亟逐去之宜以其頌下史館中書舍人史館修撰王
祐等奏議曰胡旦幸以常材謬登上第職在史氏身
列諫垣而乃獻頌明廷發泄私憤謗譖聖代指斥
大臣躁人詞多前典尤戒下流訕上先儒所惡宜加
竄逐以肅縉紳丁未詔曰右補闕直史館胡旦猥以
庸瑣謬升科級兼領太史為吾近臣頃以江淮漕運
俾司其事賞賜甚厚恩獎備至年少氣銳所為不法
朕思欲全度盡與洗滌俾領東海欲其自新而乃沉

酒於酒恣行鞭扑妄奏部下吏課最以圖僥倖增置
胥吏侵用官錢醜跡升聞逮捕繫獄證左已具適會
大赦朕猶示含垢之道未行默幽之典俾在禁掖司
吾策書乃敢獻頌闕廷謗譴公輔詞意狂悖莫甚于
茲人之無良唯曰不足言之不善雖遠必達豈可寘
於周行所宜投諸四裔尚通朝俾隸方州我非無恩
汝宜自省可守殿中丞充高州團練副使依分司官
例支給半俸仍不得簽署州事戊申 上於禁中讀
書自巳至申始罷有蒼鶴自 上始開卷飛上殿吻

殆掩卷而去 上怪之以語近臣對曰此 上好學
之所感也昔楊震方講間有觀雀銜三鱸魚墮於庭
亦同其應甯州言戎人二萬衆入寇巡檢李詢率所
部蕃漢卒擊走之斬首二千級已而詔曰先是禁民
於沿邊諸郡私市馬戎人賣官馬市良而棄驚又禁
民不得私市往來死於道者甚衆戎人少利國馬無
以充舊貫自今邊郡吏謹視馬之良驚者刻毛以記
許民私市庶羌戎獲利而歲驅馬通關市有以補戰
騎之闕焉福州言先是錢銅兼用鐵錢三直銅錢之

一吏受賊盜用官物參以銅鐵錢計其贓差重自今
望悉以銅錢定其罪從之以懿州刺史田漢瓊為錦
州刺史錦州刺史田漢希為懿州刺史皆五溪之酋
帥願易其地因而授之也庚戌賜左諫議大夫參知
政事呂蒙正麗景門宅右諫議大夫簽署樞密院事
張齊賢宜秋門宅王沔崇德坊宅各一區雷州言題
風飄壞官寺倉庫民廬舍七百區

書寫人楊思恭

初對班紹宗

覆對霍良弼

太宗皇帝實錄卷第二十八

起太平興國九年正月盡二月

太平興國九年春正月壬子朔

上不愛朝羣臣詣

闕拜表稱賀丙辰命戶部推官監察御史索湘元玘

按行河決所壞民田丁巳駕幸景龍門外水磴

上臨水而坐命近臣觀之因謂近臣曰此水出於山

源清澄甘潔近河之地水味皆甘豈河澗所及乎宋

琪等對曰亦猶人性善惡染習使然也上曰卿言

是也回習射於後園上中的者五張樂賜從官飲

戊午右僕射石熙載薨熙載字凝績洛陽人也周顯

德中以進士登第在布衣時磊落有度量人皆重之
家貧事後母以孝聞治家嚴謹閤門肅然國初
上為殿前都虞候領泰寧軍節度辟為掌書記及
上領開封尹表為推官歷右拾遺遷左補闕出為崇義
軍掌書記及上即位召歸復為左補闕出知潭州
衡還擢為兵部員外郎充樞密直學士旋簽署樞密
院事車駕征河東從至鎮州拜給事中充樞密副
使還京遷刑部侍郎副使如故未幾授戶部尚書樞
密使以足疾步履蹇澁多請告上幸其第臨問太

醫診視久之未愈乃抗表求解所職優詔許之拜右
僕射至是薨年五十七上聞之至幸其第臨喪涕
泗詔輟視朝兩日贈侍中官給葬事上悲嘆者累
日顧謂侍臣曰熙載事君之心可謂純正無他矣方
將委用而遽至此豈命乎熙載有文學性忠實遇事
盡言是非好惡無所顧避人有善必推薦之時論稱
其長者已未以元帥府掌書記黃夷簡為淮海國王
府判官元帥府支使慎知禮為淮海國王府掌書記
元帥府別駕裴祚為淮海國王府支使以錢俶解元

帥之任故也庚申國子博士鹿峭以母老拜章求解
官就養從之以國子博士韓寶為峽路轉運副使徐
州豐縣主簿李蒙正縣尉張思問並削籍為民部下
犯賊故也蒙正配隸商州葉錫壬戌詔曰國家勤求
古道啓迪化源國典朝章咸從振舉遺編墜簡蓋在
詢求致理之先無以加此宜令三館所有書籍以開
元四部書目比較據見闕者特行搜訪仍具錄所少
書告示中外若臣僚之家有三館闕書許詣館進納
及三百卷已上者與一子出身不及三百卷者據卷

帙優給金帛如不願納官者借本繕寫寫畢卻以付之先是上謂侍臣曰夫教化之本治亂之源若非書籍何以取法令三館貯書數雖不少若觀開元書目即遺逸尚多宜在廣行求訪乃下是詔以右衛大將軍李從謙知隨州癸亥命右神武將軍胡公霸督理汴河堤甲子有司言有以竊盜計贓至死者特詔貸之因謂宰相曰朕常重惜人命如此類者往往貸其極刑但時於其中取其甚者以警衆多耳不欲小人知寬貸之意恐其犯法者衆乙丑上元節上御

丹鳳樓觀燈見士庶闐咽謂宰相曰國家乘五代干戈之後朕孜孜求理惟望上天垂祐福此生民今天下阜安京師繁盛甚以為慰朕居常罕飲酒今夜與卿等同樂宜各盡醉於是每舉酒以虛爵示羣臣丙寅月有食之既丁卯房州上言涪陵縣公廷美卒上聞之震悼乃降詔曰涪陵縣公廷美朕之同氣也為姦臣所惑溺於邪說朕以宗社之故迫於公議房陵之謫不得不然永惟骨肉之親絕而不殊方欲削平前事復我舊恩忽尔淪謝有志不果痛悼之極

其何可言宜追封為涪陵王輒視朝五日仍賜謚曰
悼所司擇日冊命廷美 宣祖第四子也建隆元年
出閣領嘉州防禦使遷興元尹山南西道節度使封
天水郡侯進封郡公乾德二年加同平章事開寶六
年加侍中京兆尹永興軍節度使 上即位加中書
令開封尹封齊王從平太原進封秦王開封尹如故
七年出為河南尹西京留守坐與宰相盧多遜交通
羣臣議請寘於法 上以至親不忍止令就第未幾
黜為涪陵縣公遷房州安置因憂志成疾至是卒

上聞之嗚咽流涕悲不自勝謂宰相曰廷美自少剛
愎及長而尤惡如此朕以同氣至親不忍置之於法
俾居房陵異其思過中心憫之未嘗暫忘方欲推恩
與之復舊遽茲殞逝痛傷奈何後因從容言及廷美
朕乳母陳國夫人耿氏所生耿氏後出嫁趙氏生供
奉官趙延俊即廷美之同母弟也朕待延俊固無猜
忌常令屬鞮侍左右而延俊以同母之故頗泄禁中
事於延俊頃者方營西池而橋梁未備朕將欲泛舟
於池中廷美與左右謀欲以此時竊發謀若不果即

廷美詐稱疾於邸侯 車駕臨幸即為他變有以是
謀來告者當時若令有司窮究則廷美罪不容誅朕
以天倫之愛不欲暴揚其醜及與多遜連謀即命居
守西洛而廷美猶不悔過益怨望言不遜始命遷房
陵以全省之朕於廷美固無所負李昉對曰涪陵恃
逆天下共聞而宮禁中事若非陛下委曲宣示臣等
何由知之戊辰命左領軍衛將軍趙誨等六人分往
諸郡督修河之役辛未詔曰朕每恤蒸民務均興賦
或有失今即與蠲除蓋欲惠貧下之民豈復以多少

為限自今諸州民訴水旱二十畝以下者皆令檢勘
先是廩州上言民訴水旱二十畝以下請不在檢視
之限上以貧民當恤之故有是詔壬申詔諸道州
府去年官所貸粟並除之癸酉上為陪陵王廷美
發哀於別殿羣臣詣崇政門奉慰左諫議大夫參知
政事李穆卒穆字孟雍開封陽武人也與弟肅皆中
進士第穆授郢州軍事推官遷汝州防禦判官未
幾拜右拾遺殿中侍御史通判洋州移陝州詔以郡
中租輸洛邑不即應命坐免官肅時為博州從事穆

迎其母就前居家貧單瓢自樂兄弟怡怡如也自是
優游經史間殆無仕進意久之擢為太子中允逾年
拜左拾遺知制誥書命典雅有元和之遺風穆與參
知政事盧多遜同門生太祖嘗謂多遜曰穆士大
夫之中仁善者詞學之外他無所預多遜曰穆雖若
是然操行端直臨事不以生死易節所謂仁而有勇
者也時太祖方圖取江南已部分諸將而未有發
兵之端求所以使江南召李煜入朝者以為獲不測
之險難其人由是太祖謂多遜曰若如爾言無以

易穆遂遣之穆至金陵諭以朝旨煜辭以疾且言上
事大朝者以其望全濟之恩今若此有死而已穆
曰朝與否惟國主自處之然大朝兵甲精銳萬物
繁富恐不易當其鋒宜孰思之無使後悔及還具言
其狀太祖以謂所諭要切而江南亦謂所言誠實
後煜歸朝獲全宥者亦穆之力也上即位改左補
闕知制誥如故尋充史館修撰判館事上征并汾
還真拜中書舍人文學履行益為上所知盧多遜
之得罪也以其情分款洽責授司封員外郎明年春

盜捕之經時不獲 上欲必得之令原其罪贖賞果
有告者乃軍人數輩結約夜踰壘垣而出盡獲而戮
之因徧索軍中累有罪犯兇惡無賴者得數百餘人
不悉殺以鐵鉗鉗其頸羈於本軍至是並釋之仍各
賜錢三千

太宗皇帝實錄卷第二十八

書寫人張容

初對班

紹宗

覆對霍良弼

太宗皇帝實錄卷第二十九

起太平興國九年三月至四月

三月壬子朔宴中書門下翰林學士文武常參官節度觀察防禦團練使刺史諸軍校百夫長已上外國蕃客於大明殿上謂宰相曰天下無事良辰宴飲無辭盡醉飲畢以虛爵示羣臣宰相言飲酒過度恐有失儀之責上召權御史中丞滕中正笑而謂曰今日宴會蓋以君臣相遇為樂朕賜酒欲其歡洽苟小有失儀卿可勿舉劾也既罷因召渤海都指揮使大鸞河慰撫久之謂殿前都指揮使劉延翰曰鸞河

渤海豪將投身歸我朕甚嘉之夷戎之俗以射獵馳
逐為樂待秋涼當與馬數十匹令出游獵以遂其性
仍賜酒及錢十萬驚河渤海之酋帥也 上征并汾
首率小校李勲等十六人部族三百騎來降 上憐
其忠順故有是賜是日以河決將塞命翰林學士宋
白秉傳詣白馬津以一太牢沈祠加璧甲寅詔曰蓋
聞刑者不可復屬死者不可復生故三聽行誅聖人
之所至慎一成不變君子之所盡心朕勤恤兆民哀
矜庶獄每至三伏炎蒸之際隆冬寒沍之時未嘗不

念彼國祚憫茲微經而猶胥姦吏弄法舞文或苛虐
以立威或稽留而不決撓憲令之綱紀傷天地之
和平而欲百姓阜安四時順序其可得乎應天下繫
因宜令逐處州府軍監每十日一具所犯事由收禁
月日聞奏仍委刑部糾舉乙卯日本國僧裔然與其
徒五六人自其國至進銅器十餘事并本國職貢古
今年代紀各一卷裔然衣錄自云俗姓藤原氏父為
真連真連者其國之五品官也裔然善書札與中國
無異而不通華言問其土風但書以對云國有五經

及釋氏經教並得自中國有白居易集七十卷五穀
果實四時寒暑大抵類中國多黍而少麥交易用錢
其文曰軋文大寶無索馳有水牛驢羊及羣象產絲
織絢綃薄緻可愛樂有中國及高麗二部國東鄰海
島夷人所居身面皆有毛其東則大海無際東粵則
產黃金西別島生白銀為國貢賦國王以王為姓年
號天地元管六十八州土地廣而人民少壽百餘歲
者徃徃有之其國王傳襲今六十四世矣文武條吏
亦皆世官上聞之歎曰此島夷耳而世嗣長久臣

下亦世官此皆古道中國近自唐季海內分裂梁唐
至周世數甚促大臣子孫鮮能繼襲父祖之業朕雖
德不及往聖然孜孜求理恐庶獄有枉撓未嘗敢自
暇自逸以政游藝伎為樂冀上玄降鑒亦以為子
孫計使皇家運祚永久而臣僚世襲祿位卿等各宜
盡心以輔朕之為治無使遠夷獨享斯慶因賜旂
紫衣館於太平興國寺丙辰遷祕書丞楊延慶等十
餘人分為諸州知州上因謂宰相曰刺史之任最
為親民非其人則下受其弊昔後漢秦彭為潁川郡

守教化大行百姓懷惠乃有鳳凰麒麟嘉禾甘露之
瑞足為善政故也以一太守善為政猶若此况若天
下者乎何謂太平之不可致和氣之不可招也丁巳
駕幸相國寺回習射於後園上中的者五召近臣
飲宴上甚悅因謂宰相曰夏州蕃部並已寧謐向
之勁悍難制者皆委身歸順凡得酋豪三百七十餘
人約三五萬帳族得十年已來戎人所掠人畜凡二
萬五千口朕聞者所遣將帥皆丁寧誠諭如蕃部中
有狡惡為害者必以威武臨之順伏易制者必綏輯

慰勞之是以戎人畏威而感惠昨亦不勞饋運祇令
齎茶於蕃部中貿易供給亦無所闕又謂李繼捧曰
爾在夏州能制蕃部乎對曰諸族狡惡不可制臣但
羈縻而已若非天威所加豈能制御者乎命國子禮
記博士孔維判監事己未滑州言河決已塞羣臣稱
賀先是河決於韓村數州之地皆罹其災上患之
集丁夫十餘萬治之自秋逾冬功既畢而復決上
以方春播種不欲重煩民力於是發卒五萬人以侍
衛步軍都指揮使田重進總督其役供奉官劉吉副

之吉河東人有膽勇不畏強禦明習河堤利害自贊
請行且言河決未塞願夷族 上壯之命吉領其役
吉親負土與役徒晨夜兼作至是而塞吉之功居多
即以吉為西京作坊副使賜予甚厚 上製平河歌
賜宰臣宋琪等因謂曰昔漢武有瓠子之歌今朕聊
志一時之事壬戌以左羽林統軍周保權知并州以
右屯衛上將軍孟玄珪為宋曹兗鄆都巡檢乙丑召
宰相近臣賞花於後園 上曰春氣暄和萬物暢茂
四方無事朕以天下之樂為樂宜令侍從詞臣各賦

詩 上習射於水心殿宰相宋琪等各以應制詩進
上吟味久之翰林學士承旨扈蒙有微臣自媿頭如
雪也向鈞天侍 玉皇之句 上笑謂曰卿善因事
陳情也蒙頓首謝卒未詔曰昨以河堤偶決近旬罹
災言念編民載深軫慮應開封府管內諸縣無出今
年租賦壬申 駕幸含芳園習射 上中的者四宗
琪奏曰陛下控弦發矢一如十五年前在晉邸時
上曰朕比往時筋力雖未覺衰然少時好馬上馳射
今不復為矣因謂琪曰園游之地三數年不一至此

且非數出宴游也時劉繼元孟玄珏錢惟濟李繼捧
亦侍坐宋琪奏曰繼元以下各江南塞北之人嘗各
據土疆累世不賓今並束身歸命入侍旒宸非神功
聖德冠絕千古豈有如此之盛乎宋琪李昉呂蒙正
李至各賦詩進上皆和而賜之上又製晚春游
合芳園五言十韻詩一首賜宋琪等癸酉麟州言閣
門使田仁朗敗戎人斬首三百級獲馳馬生口器甲
千計乙亥以連州刺史任知果本官致仕上章告老
故也丙子甘露降太一宮祠庭栢樹先是都城東南

建五福太一祠既成致饗於神祠官悉集未明前數
刻而降已卯召宰相近臣宴於後苑上賦詩一章
賜侍臣俾之屬和

夏四月壬午光祿卿湯悅卒悅字德川其先陳人後
家於江東之青陽父文圭乾寧五年進士登第以世
方亂將南歸梁祖時節制夷門愛其才欲辟於幕府
文圭不欲就遁去至會稽錢鏐欲縻之亦不願止去
詣宣州田頔頔執甥姓之禮待之文圭但從容談笑
無所預頔敗獲免至淮南楊渥以為掌書記悅幼穎

悟九歲而孤善屬文仕吳為祕書省校書郎時張廷
翰宗齊丘皆掌吳政以悅俊敏共推薦之授祕書郎
直門下遷水部員外郎改本曹郎中並知制誥李昇
建國授中書舍人時書命填委悅援筆立成詞理典
瞻未幾擢為翰林學士李景繼立加學士承旨遷礼
兵部侍郎改中書侍郎簽署省事罷職拜戶部尚書
依前充學士承旨周世宗舉兵至淮上李景以機務
方繁命悅知樞密院事顯德五年淮南平景遣八貢
先是世宗駐蹕於揚州孝先寺見悅所撰碑數讀久

之及至待之禮甚優異 太祖受禪景耀遷洪州以
子煜守金陵留悅佐之煜嗣位拜右僕射充樞密使
加同平章事節制閬州不樂在鎮改授太子太傅監
修國史旋守司空判尚書省再秉政江南平歸朝改
授太子少詹事 上即位以悅素有才名召直學士
院踰年改光祿卿至是卒年七十三輟視朝一日悅
本姓犯 翼祖廟諱而名崇義後改姓又改名有詞
人從江南來因謁悅從容評及江南文士謂悅曰二
徐及公詩皆善惟崇義差不及耳聞者傳以為笑癸

未以涪陵王子德恭為峽州刺史德隆為懷州刺史
女壻韓崇義為靜難軍節度行軍司馬右衛率府副
率段守榮決杖仍削籍為民生華州監倉槩量為姦
故也甲申命宰相及羣官分禱京城祠廟祈雨是夕
雨足以東上閣門副使王侁為西上閣門使戊子宰
相宋琪率文武百官及諸軍將校蕃夷酋長僧道耆
老二萬六千三百五十人詣東上閣門再拜稽首上
言曰臣等聞皇王大功莫大於混一中夏古今盛禮
莫盛於登封介丘其或鯨海鷁林已闢于效貢金泥

玉檢尚關於告成則何以繼三五之鴻猷副億兆之
虔望臣珙等誠惶誠懼頓首頓首伏惟 應運統天
肅文英武大聖至明廣孝皇帝陛下紹勛華之正統
施造化之玄功亘地罄天固不率俾望雲就日無所
不賓爰自唐室衰微四方雲擾東吳西蜀瓜剖豆分
民無遠歸亂靡有定梁唐祚短不服經營晉漢綱頽
莫能恢復陛下膺圖出震執契嚮明四海於是會同
二儀以之交泰歷代之典章畢舉生民之耳目惟新
極千古以牢籠掩八紘而覆育離肩反踵之俗襲冠

帶者以百數白環碧砮之貢充饗邠者以千計鑿空
萬里攘地千都豈止廣長榆而通大夏靈臞交集珍
符撫至皇獨歌赤厲而頌白麟暢玄化於胥庭均至
和於寓縣歷選列辟盛德大業未有如此之盛者也
是以三事大夫泊于黃髮之叟咸頌延頸企踵以觀
大禮于升中是宜訪制云亭追蹤八九以荅主臞以
徇羣心若却之而不顧抑之而非處則何以塞神祇
之望慰夷夏之心哉伏請申命有司草定儀注擇吉
日登泰山昭厥成功以光盛禮臣等不勝大願詔荅

曰朕嘗乙夜觀書鑒前王之事迹多矣若乃至聖同
堯大功超舜底績類於伯禹敷佑比於成湯然後可
以高蹈介丘遐登日觀告成功於上帝祈景福于
下民歷萬代以流光冠百王而擅美者也其或功虧
治定德謝欽明道未洽於黎民信未孚於寓縣安可
告成天地展禮云亭朕自纘丕圖若涉淵水方思
日慎以答天休止期粗洽於小康焉敢輒言于大禮
卿等忠於事主善則稱君誠雖可嘉事則未暇省覽
數回愧畏良深所請宜不允辛卯羣臣再上表曰臣

琪等今月八日拜章丹陛歷懇明庭叙華夷億兆之
心述天地神祇之意乞展告成之禮聿修帝類之
儀庶耀玄功式昭盛德遠頒明詔未允丹誠中外顯
願懌知所處伏惟應運統天睿文英武大聖至明
廣孝皇帝陛下通倂覆載明並照臨進三五以同符
體陰陽之不測而自紹開寶運光啓鴻圖親駕戎車
自秉武節靈旗所指并汾摧破竹之威文誥所施東
南無負海之固此陛下武功震耀之力也視朝之暇
廣倦觀書聽政之餘常開論道酌百王之步驟盡得

英華考夏商之質文皆窮奧妙淳化由是不炎玄功
以之孔昭此陛下文德化成之功也若乃萬機在念
常切宵衣一物疚懷未嘗高枕故得刑清訟息俗阜
民和草木效祥盡入朱絃之奏羽毛薦瑞皆登清廟
之歌臣等歷觀自古受命封禪之君交三神之歡接
千歲之統未有如陛下之盛也况道超軒昊功冠古
今而尚闕登封之儀猶稽肆覲之禮臣等有所未諭
也伏願拾謙讓之小節思光大之遠圖特詔禮官申
明大典遂萬國侍祠之願詣百靈望幸之心俾耀宸

卷一百一十五

十

區以光簡冊詔答曰朕恢績丕圖誕膺駿命屬九服
清宴四時順成祥瑞荐臻災沴不作斯蓋天地之
垂祐宗廟之降靈至於庶政允釐彝倫攸叙則輔
弼之力戎夷畏服疆場底寧則將帥之效在于涼德
何能致是而文武百辟華夷衆心繼歷懇以同辭願
升中而展禮雖歸功于上足見忠誠而涉道未深殊
增媿畏再煩啓迪徒切嘉稱所請宜不允癸巳內外
文武羣臣三上表曰臣珙等言近者以昇平斯久告
謝猶稽再陳率土之心乞展泥金之礼臣誠既竭乃

春未回彌增深薄之憂寧宜再三之讀臣珙等誠懇
誠迫頓首頓首伏惟 應運統天睿文英武大聖至
明廣孝皇帝陛下慶演丹陵道光赤水勵清明而御
俗躬玄默以化人武暢九垓則華夷偃革恩覃萬彙
則翔泳懷仁頽莖玄甲之祥昭宣綰史文鉞碧瓘之
貢洋溢臺榭去冬鄒魯遺氓班白舊老持囊連袂萬
衆一心咸陳盛德之容願覩升中之慶而 皇帝陛
下未回宸想猶執謙尊况今上瑞仍臻休徵沓至欽
崇主館則湛露垂甘堦塞洪河則榮光順道漢武之

窮兵遠代遽紀三山世祖之乘運中興仍修八陞功
微大定業謝時雍豈若 皇帝陛下今日之盛也又
安可久達玄貺高謝鴻名鬱 宗社之耿光略皇王
之丕訓伏覲朱倪寬之往議詢梁松之舊言俾掌故
奏儀司歷練日儼播紳以戒路肅羽衛于周廬日觀
儲精俟俟蒼璧之禮天孫寫望迎黃屋之來金泥玉
檢以盡誠六舞五声而節步大備闕典咸秩無文驅彼
黎元躋于仁壽垂統成化億萬斯年豈不盛哉豈不
偉哉臣等本以微生親承大化儻獲侍和鑒而登降

原
闕

事宋琪為封禪大禮使翰林學士承旨扈蒙為礼仪
使翰林學士宋白為鹵簿使賈黃中為儀仗使辛丑
以駕部員外郎劉蟠監察御史索湘為泰山路轉運
使太府卿馬峯卒峯太原人仕劉繼元至右僕射致
仕歸朝為將作監稍遷太府卿分司西京至是卒年
八十餘詔輟視朝一日峯善服食為壽康彊無疾好
持論性鄙恢無他可稱述馬癸卯以儀鸞副使康仁
寶等部署丁匠七千五百人修宮壇於泰山甲辰布
衣趙垂慶詣匭上書言 皇家當越五代而上承唐

統為金德若以梁上繼唐傳後唐至國朝亦合為
金德矧自禪代已來符瑞狎至羽毛之類色白者不
可勝紀皆金德之應也望改正朔易車旗服色以承
天統事下尚書省集百官定議右散騎常侍徐鉉等
奏議曰五運相承國家大本著于前載具有明文
頃以唐末喪亂朱梁篡代莊宗以早編屬籍繼立世
功親雪國讎天下稱慶即以梁比于此羿王莽之徒
不可以為正統也莊宗中興唐祚重新土德自後數
姓相傳晉以金漢以水周以木天造皇宗運膺火

德况國初便祀火帝為感生帝于今二十五年矣而
又國丘展禮已經六祭自是日盛一日年穀豐登于
戈偃戢必若聖統未合天心焉有太平得如今日此
皆上玄降祐清廟垂休致成恢一統之運也豈可輒
因獻議便從改易恐違春命深所未安又云梁至周
不合迭居五運欲我朝上繼唐統宜為金德且後唐
以下奄宅中區合該正統今便廢絕禮實無謂且五
代運遷皆親承授質文相次間不容髮豈可越數姓
之上繼百年之運此不可之甚也按唐書天寶九載

崔昌獻議自魏晉至周隋皆不得為正統欲唐遠繼
漢統立周漢子孫為王者後備三恪之禮當時朝議
是非相半集賢學士衛色扶同李林甫遂行其事至
十二載林甫卒後復以魏周隋之後依舊為三恪崔
昌衡色並皆遠貶此又前載之甚明也况今國家封
禪有日宜從定制上荅玄休伏乞 聖宗永為火德
從之丙午以坊州刺史馮鐸澤州刺史齊超分巡黃
河堤堰戊申以侍御史張昉本官知雜事從憲臺之
舉也

太宗皇帝實錄卷第二十九

書寫人楊思恭

初對班

紹宗

覆對霍良弼
